

四庫全書

集部

欽定四庫全書

集部
宋詩紀事卷二十六

詳校官給事中臣鄧文泮

侍讀臣孫球覆勘

總校官進士臣繆琪

校對官典簿臣郭祚熾

謄錄監生臣葉世華

欽定四庫全書

宋詩紀事卷二十六

錢塘厲鶚撰

蔣之美

之美之奇弟宜興人熙寧六年進士

遊惠山寺

維舟上重巘景物近斜暉流水連珠落殘花碎錦飛白
雲隨步武幽鳥傍軒扉拂井松傾蓋緣崖蘚上衣池光
清可鑑竹色翠成圍更接高僧話林梢帶月歸

惠山集

吳棫

棫字顧道歐寧人熙寧六年進士徽宗朝官龍圖閣學士鎮成都後知鄆州中山府

暑雪軒

呪土臺頭寺披襟笑語閒千年雲抱石六月雪彌山酒熟藹嘗外茶新碾試間要湏時點筆來此賦躋攀

成都文類

嚴陵懷古

龍袞新天子羊裘古野人清名在林藪高行動星辰風

月空齊地烟霞自富春
滄浪秋更碧不敢濯塵纓
釣臺集

登姜相臺

滿林紅葉墜紛紛
耆老猶言別駕墳
舊府光華闕右月
故鄉蕭索海南雲
酒杯湖上同方伯
茶竈巖邊共隱君
二百餘年真一夢
遶牆荒隴半耕耘

題秦君亭

秋日春風麗句亭
先生天上少微星
滿爐松影隨香碧
一硯苔痕帶雨青
姜相笑中應斗酒
等公談外祇函經

何人為我攜氈蠟來洗蒼碑墨數廳

以上南安縣志

劉次莊

次莊字中叟長沙人以開梅山入洞曉諭得官
熙寧六年賜同進士出身仕至侍御史江西漕
使

敷淺原見桃花

桃花雨過碎紅飛半逐溪流半染泥何處飛來雙燕子
一時銜在畫梁西

墨莊漫錄

江神祠

髻插幽蘭花手把菖蒲葉
漁郎偷語人云是江神妾
江神昨夜鼓雲濤開帆拍
天上千艘吳洲女兒弄春
水浪溼船頭紅錦袍

前賢小集拾遺

王昭君

歛袖出明光琵琶道路長
初聞羌騎語未解漢宮妝
薄命隨塵土元功屬廟堂
蛾眉知有用慚媿羽林郎

瀛奎律髓

崔嶧

嶧長安人第進士累官河東轉運使刑部侍郎

致仕

題萊公泉

事詳范諷詩下

三相南行至道初記名留詠在精廬甘泉不洗天涯恨

留與行人鑒覆車

湘山野錄

呂大臨

大臨字與叔大鈞之弟受學伊川之門登進士

監鳳翔府司竹監元祐中除太學博士遷祕書

省正字有玉溪集

春靜

花氣自來深戶裏
鳥聲長在遠林中
斑斑葉影垂新蔭

曳曳絲光入素空

濂洛風雅

孔宗翰

宗翰字周翰道輔次子第進士知虔州元祐中

官刑部侍郎以寶文閣待制知滁州未拜而卒

題壁

屈指從來十七年交親零落一潸然
嬋娟再見中秋月
依舊清輝照客眠
四朝詩

畢仲游

仲游字公叔士安子第進士元祐初召試學士
院擢為第一除集賢校理歷職方司勳員外郎
京南淮南轉運副使以黨籍終于西京留臺有
西臺集

寄鄭介夫

鄭子安強否梅花萬里春如何投虎穴直欲犯龍鱗北
闕今無數南方信有人可憐妻子在年少不謀身

宋文鑑

絕句

水痕天影淡相宜露坐秋涼乍快時桐葉芭蕉最多事
曉昏風雨報人知

全芳備祖

邢恕

恕字和叔鄭州原武人從伊川學第進士以薦
歷職方郎哲宗紹聖初擢御史中丞以罪落職

俄復顯謨閣待制提舉崇福宮建炎初追貶常德軍節度副使

遊浯溪

歸舟一夜泊浯溪晚雨絲絲不作泥指點蒼崖訪遺刻
更磨苔蘚為留題

浯溪集

朝陽洞

溪流貫清江湍瀨亘百里龍蛇幾盤紆雷雨忽奔駛石
渠伏穿鑿怪力祖誰氏突如見頭角虎豹或蹲峙橫江

立棟柱小艇俄紛委蘋藻翳泓澄松竹蔭崖溪兩山東
烏道側岸數魚尾繚然閼深幽梵宇疊危址鐘唄雜灘
聲亭臺森水底凭闌幾遊目策杖時臨履酒杓閒茶鐺
碁枰延晝晷放懷得天倪清嘯謝塵滓忽忘兒女縛似
接羸秦子顧予拙謀身霜鬢颺垂耳雅意在延齡丹砂
夙充餌焉得茲結廬悵念遠桑梓

湖廣通志

秦觀

觀字少游一字太虛高郵人舉進士元祐初蘇

軾以賢良方正薦除祕書省正字兼國史院編
修官紹聖初坐黨籍削秩監處州酒稅徙郴州
編管橫州又徙雷州放還至藤州卒有淮海集
閒居集

苔溪漁隱叢話東坡薦少游于荆公云向屢言
高郵進士秦觀太虛公亦麓知其人今得其詩
文數十首詞格高下固已無逃于左右此外博
綜史傳通曉佛書若此類未易一一數也荆公
荅書云示及秦君詩適葉致遠一見亦以謂清
新婉麗鮑謝似之公奇秦君口之而不置我得
其詩手之而不釋又聞秦君嘗學至言妙道無
乃笑我與公嗜好異乎

呂氏童蒙訓雨砌墮危芳風軒納飛絮之類李公擇以為謝家兄弟得意不能過也少游遊嶺後詩嚴重高古自成一家與舊作不同王直方詩話少游紹聖間以校勘為杭倅方至楚泗間有詩云平生逋欠僧房睡準擬如今處處還詩成之明日以言者落職監處州酒人以

為詩識
教陶孫詩評秦少游如時女遊春終傷婉弱

和黃法曹憶建溪梅花

海陵參軍不枯槁醉憶梅花愁絕倒為憐一樹傍寒溪
花水無情自相惱清淚斑斑知有恨恨春相逢苦不早
甘心結子待君來洗雨梳風為誰好誰云廣平心似鐵

不惜珠璣與揮掃月落參橫畫角哀暗香鎖盡令人老天
分四時不相貸孤芳轉盼同衰草要須健步遠移歸亂
插繁花向晴昊

易元吉獐猿圖歌

參天古木相繆枝嵌空怪石銜清漪兩猿上下一旁挂
兩猿熟視蒼蛙疑蕭蕭叢竹山風吹海棠杜宇相因依
下有兩獐從兩兒花餐草齧含春嬉易老筆精湖海推
畫意忘形形更奇解衣一掃神扶持他日自見猶嗟咨

金錢百萬酒千鵝荆南將軍欣得之老禪豪取橐為垂
白晝掩門初許窺房櫳炯炯明冬曦榛叢羽革分毫釐
殘編未終且歸讀歲暮有閒重借披

贈女冠暢師

瞳人翦水腰如束一幅烏紗裏寒玉超然自有姑射姿
回首粉黛皆塵俗霧閣雲窓人莫窺門前車馬任東西
禮罷曉壇春日靜落紅滿地乳鴉啼

洞江詩話暢姓唯汝南有之其族尤奉道男女
為黃冠者十之八九時有女冠暢道姑姿色妍

麗神仙中人也少游批之不得作詩云云

和參寥

樓閣過朝雨參差得霽光
衣冠分禁路雲氣繞宮牆
亂絮迷春閣
嬌花困日長
平康在何處
十里帶垂楊

王直方詩話參寥言舊有一詩寄少游少游和之云云
萃老讀至末句言者小子又賤發也少游後編淮海集遂改云經句牽酒伴猶未獻長楊

題大年小景四首

本自江湖客
宦遊何苦心
因君小平遠
還我舊登臨

公子歌鐘裏何曾識渺茫唯應斗帳夢曾入水雲鄉
曉浦烟籠樹晴江水拍空煩君添小艇畫我作漁翁
島外雲峯晚沙邊水樹明想當揮灑就侍女一時驚

春日偶題呈上尚書錢丈

三年京國鬢如絲又見新花發故枝日典春衣非為酒
家貧食粥已多時

王直方詩話少游為黃本校勘甚貧錢穆父為
戶書皆居東華門之堆塚場少游春日作詩遺
穆父云云穆父以米二石送之

秋日

霜落邗溝積水清
寒星無數傍船明
菰蒲深處疑無地
忽有人家笑語聲

月團新碾瀾花瓷
飲罷呼兒課楚詞
風定小軒無落葉
青蟲相對吐秋絲

連蜷雌蜺挂西樓
逐雨追晴意未休
安得萬妝相向舞
酒酣聊把作纏頭

藝苑雌黃云此語亦豪而工矣

遊仙詩

陰風一夜攪青冥
風定霏霏雪霰零
想見玉清真境上
白虛光裏誦黃庭

夜深樓上撥書眠
天在闌干四角邊
風掃亂雲毫髮盡
獨留壁月照人圓

天風吹月入闌干
烏鵲無聲子夜閒
織女明星來枕上
了知身不在人間

白璐按此首墨莊漫錄作納侍兒邊朝華之作

本是廬山種杏人
出山來事碧虛君
上清欲問因何到

請看仙家十賚文

以上淮海集

侯鯖錄此詩東坡稱之

遣朝華

月露茫茫曉析悲
玉人揮手斷腸時
不須重向燈前泣
百歲終當一別離

再遣朝華

玉人前去卻重來
此處分攜更不回
腸斷龜山離別處
夕陽孤塔自崔嵬

墨莊漫錄少游侍兒朝華姓邊氏京師人元祐
癸酉歲少游納之嘗為天風吹月入闌干之詩
時朝華年十九也後三年少游欲修真斷世緣
遂遣歸父母家資以金帛而嫁之朝華臨別泣
不已少游作詩云云既去二十餘日使其父來
云不願嫁卻乞歸少游憐而復取歸明年少游
出倅錢塘至淮上因與道友論議嘆光景之速
歸謂朝華曰汝不去吾不得修真矣亟使人走
京師呼其父來遣朝華隨去復作詩云云時紹
聖元年少游嘗手書記此事未幾遂竄南荒

遊杭州佛日山淨慧寺

五里喬松徑千年古道場泉聲與嵐影收拾入僧房

鐵網

珊瑚

張賈

夢中作

天風吹散赤城霞
染出連雲萬樹花
誤入醉鄉迷去路
傍人應笑不還家

西清詩話張賈熙寧中夢行大空中聞天風海
濤聲振林木徐見海中樓閣金碧瓊裾琅佩者
數百人揖賈出紙請賦詩細視筆研皆碧玉色
且戒之曰此閒文章要似隱起鸞鳳當與織女
機杼分巧過是乃人閒語耳賈成絕句云云有
仙人曰子詩佳絕未免近凡酌酒一杯極甘寒
忽覺身墮萬仞山而寤

張耒

耒字文潛楚州淮陰人第進士元祐初仕至起居舍人紹聖中謫監黃州酒稅徽宗召為太常少卿坐元祐黨復貶房州別駕黃州安置尋得自便居陳州主管崇福宮卒有柯山集

王直方詩話文潛人物魁偉故無已有詩云張侯便然腹如鼓雷為飢聲汗為雨山谷有詩云

六月火雲蒸肉山皆戲語也

石林詩話頃見晁无咎舉文潛斜日兩竿眠犢晚春波一頃去盡寒自以為莫及又云文潛過宋都詩白頭青鬢隔存沒落日斷霞無古今氣

格不減老杜

呂氏童蒙訓文潛詩自然奇逸非他人可及如秋明樹外天客燈青映壁城角冷吟霜淺山寒帶水早日白吹風川鳴半夜雨卧冷五更秋之類迥出時流

能改齊漫錄張文潛言昔以黨人之故坐是廢放每作詩嘗寄意焉有云最憐楊柳身無力付與春風自在吹又云梧桐直不甘衰謝數葉迎風尚有聲

韓幹馬

頭如翔鸞月頰光背如安輿鳬臆方心知不載田舍郎尚帶開元天子紅袍香韓幹寫時國無事天閑樹蔭春

書長雙髯執轡儼在傍如瞻馳道黃屋張北風揚塵燕
賊狂廐中萬馬驅范陽天子乘騾蜀山險滿川苜蓿為
誰芳

侯鯖錄元祐中館職諸公賦韓幹馬詩獨文潛
最高勝

七夕歌

人閒一葉梧桐飄蓐收行秋回斗杓神宮召集役靈鵲
直渡天河雲作橋橋東美人天帝子機杼年年勞玉指
織成雲霧紫綃衣辛苦無懼容不理帝憐獨居無與娛

河西嫁得牽牛夫自從嫁後廢織紵綠鬢雲鬟朝暮梳
貪懽不歸天帝怒謫歸卻踏來時路但令一歲一相逢
七月七日河邊渡別多會少知奈何卻憶從前恩愛多
恩恩離恨說不盡燭龍已駕隨羲和河邊靈官曉催發
令嚴不管輕離別空將淚作雨滂沱淚痕有盡愁無歇
寄言織女若休歎天地無窮會相見猶勝嫦娥不嫁人
夜夜孤眠廣寒殿

侯鯖錄此歌東坡稱之

離黃州

扁舟發孤城揮手謝送者山迴地勢卷天豁江面瀉中
流望赤壁石腳插水下昏昏烟霧嶺歷歷漁樵舍居夷
十三載鄰里通假借別之豈無情老淚為一灑篙工起
鳴鼓輕櫓健于馬聊為過江宿寂寂樊山夜

容齋隨筆文潛暮年哦老杜玉華宮極力模寫
其離黃州詩偶同此韻音響節奏固似之矣讀
之可默喻也

題中興頌碑後

玉環妖血無人掃
漁陽馬厭長安草
潼關戰骨高于山
萬里君王蜀中老
金戈鐵馬從西來
郭公凜凜英雄才
舉旗為風偃為雨
灑掃九廟無塵埃
元功高名誰與紀
風雅不繼騷人死
水部胷中星斗文
太師筆下蛟龍字
天遣二子傳將來
高山十丈磨蒼崖
誰持此碑入我室
使我一見昏眸開
百年廢興增歎慨
當時數子今安在
君不見荒涼渢水
棄不收時有遊人
打碑賣

留題奉先寺

荒涼城南奉先寺後宮美人官葬此角樓相望高起墳
草間柏下多石人秩卑埋骨不作冢青石浮屠當丘隴
家家墳上作享亭朱門相向無人聲樹頭土梟作人語
月黑風悲鬼搖樹宮中養女作子孫年年犢車來作主
廢后園林官道側家破無人掃陵域官家歲給半千錢
街頭買餅作寒食

秋螢行引

碧梧含風夏夜清林塘五月初飛螢翠屏玉簾起涼思

一點秋心從此生
方池水深溪雨積
上下輝輝亂凝碧
幸因簾捲到華堂
不畏人驚照瑤席
漢宮千門連萬戶
夜夜熒煌暗中度
光流太液池上波
影落金盤月中露
銀闕蒼蒼玉漏遲
年年為爾足愁思
長門怨妾不成睡
團扇美人還賦詩
避暑風廊人語笑
闌下撲來羅扇小
已投幽室自分明
更伴殘星碧天曉
君不見連昌宮殿
洛陽西破瓦頽垣
今古悲荒榛腐草
無人迹只有秋來
熠燿飛

柳

永豐坊裏舊腰肢，曾見青青初種時。
看盡道傍離別恨，爭教風絮不狂飛。

以上張右史集

贈營妓劉淑女

初官通許時作

可是相逢意便深，為郎巧笑不須金。
門前一尺春風髻，窗外三更夜雨衾。
別燕從教燈見淚，夜船唯有月知心。
東西芳草渾相似，欲望高樓何處尋。

未說蝤蛴如素領，固應新月學蛾眉。
引成密約因言笑，

認得真情是別離尊酒且傾濃琥珀淚痕更著薄胭脂
北城月落烏啼夜便是孤舟腸斷時

侯鯖錄

木香

紫皇寶輅張珠幃玉女熏籠覆繡衾萬紫千紅休巧笑

人間春色在檀心

墨莊漫錄

次韻奉酬无咎兼呈慎思天啟

平生結交圓納方過眼十人八九忘
晚蘭蕙畝幽谷芳
嬾隨家奴諛五郎苦飢方朔身漫長
顛毛種種顏欲蒼

誰謂勝癡端坐狂清淮之陰一草堂列筆作陣茶森槍
絕口平戎與破羌百年如此計亦臧何用竊食官倉糧
玄黃病足畏高岡但願縮頸老支牀煌煌東壁日月傍
神仙鸞鳳爭騰驤萬書落架城復隍牙籤如雲丹碧裝
晁侯再作班與揚正始故在何曾亡江湖十年願飽償
夜成七發光出囊蘇公後出長卿鄉為君吳都無一行

蘇翰林欲作杭州賦見
无咎杭州七述乃止

世有伯樂生驕驕肯使弭耳隨

鹽商鄧侯楚山深閨房名走上國交侯王朝隨日影夜

燈光包攬今古窮炎黃吐詞分葩有國香近君如雪六
月涼又似心醉醞醞觴東南蔡子名飛翔同隨天書拜
未央瑰瑋宏傑萬夫望頰牙凜凜有風霜文如神鼎爛
龍章鍾山長齋讀老莊論兵說佛兩俱忙不夸得硯文
字祥但願破敵如頰牆我窮乞酒更得漿仰看三虎爭
雄張

同文館倡和詩

輸麥行并序

余過宋見倉前村民輸麥止車槐陰下其樂洋

洋也晚復過之則扶車半醉相招歸矣感之因
作輸麥行以補樂府之遺云

場頭雨乾場地白老稚相呼打新麥半歸倉廩半輸王
免致縣吏相催迫羊頭車子毛布囊淺泥易涉登前岡
倉頭買券槐陰涼清嚴官吏兩平量出倉掉臂呼同伴
旗亭酒美單衣換半醉扶車歸路涼月出到家妻具飯
一年從此皆閒日風雨閉門公事畢射狐兔歲蹉跎
百壺社酒相經過

蓉塘詩話自鎮江以東有獨輪小車凡百乘載
皆用之一人挽于前一人推于後謂之羊頭車
書籍未見載此名者獨張文潛翰參行云羊頭
車子毛布囊泥淺易涉登前岡始見詩人用之

劉純臣

純臣新建主簿

送王迪夫婦偕隱

髮如抹漆左參軍脫去青衫作隱淪世上更無羈絆事
壺中別有自由身鼎烹玉兔山前藥花看金黿背上春
莫怪少年能決烈藍田夫婦總登真

復齋漫錄熙寧中王迪為洪州左司理有道人磨鏡俾迪自照見星冠羽帔縹緗鏡中遂棄官與妻偕隱純臣詩送之云云

張芝

芝汴人

投李珣廟

風軟潮生江水平
遙峰隱隱浸寒青
自從香骨沈波底
獨我為詩弔爾靈

翰府名談李珣字溫叔都官之幼女也八歲能詩後適江夏王常同汎舟射利江湖閒不久常

死而珣溺舟於三山磯下後三日屍忽出水中
土人異之為立廟熙寧間都人張芝作詩焚廟
中云云夜見一婦人謂之曰妾溺此時水官令
賦詩及校九江會源錄一夕而畢水官大悅令
江神出屍顯靈血食于此謝子詩意所不敢當
煩磐一石載妾前事將有奉報芝後不為立石
舟再過三山幾覆又夢其婦詬責之

魯有開

有開字元翰以從父宗道恩授韋城令熙寧中
擢膳部郎中知冀州

遊大滌山

馬蹄清曉破瓊田一出紅塵骨已仙任鎖九重山下路
終尋五處洞中天泉流碧砌長鳴玉跡隱蒼崖久蛻蟬
人世歸時知變否樵夫曾記爛柯年

洞霄詩集

陳師錫

師錫字伯修建安人熙寧中廷試第三調昭慶
軍掌書記歷考功員外郎徽宗朝拜殿中侍御
史出知潁廬滑三州坐黨論削官安置郴州卒
紹興中贈直龍圖閣

題李公麟畫歸去來圖 有雪竇和尚親書偈

百中神鋒誇妙手當時破敵祇同機
餘花墮滅無人見

半偈流傳豈易知

志雅堂雜鈔

程建用

楊咨

建用字彞仲眉山人熙寧進士

大雨聯句

庭松偃蓋如醉建夏雨淒涼似秋
楊有客高吟擁鼻賦

無人共喫饅頭

轍

茗溪漁隱叢話東坡言余幼時里人程建用楊
洛家弟子由會草舍中大雨聯句六言云云坐
皆絕倒今四十餘年矣

呂南公

南公字次儒南城人熙寧鄉貢一試禮部不偶
遂罷舉自號灌園先生有集

葛仙峯

南峯枕崇坂逕路荆榛稠遺壇在其巔名為仙翁留石
角已剝泐林芳自春秋誰云塵土姿來繼丹霄遊

西江詩話

李復圭

復圭字審言邯鄲公淑之子神宗朝歷鹽鐵副
使以集賢殿修撰知荆南

秀峯上方

吳王昔日館娃宮殿閣鱗差軼碧空寂寂香魂招不得

惟餘松栢韻天風

吳郡志

句

老鳳池邊蹲不去飢烏臺上噤無聲

事文類聚前集曾魯公自嘉祐秉政至熙寧中尚在中書年雖甚高而精力不衰故臺諫無非之者惟李復圭作詩譏之云云魯公遂致仕去

楊适

适字時可棣州人年十八登第從陳后山學詩晚為尚書比部郎

絕句

尖頭奴有五兄弟十八公生四客卿過我書齋無一事似應終日待陶泓

合璧事類前集本朝百家詩載錢次公以墨四
九筆五枚賜楊時可楊戲曰安得硯乎次公曰
不難須一詩楊乃作一絕云云

李新

新字元應仙井監人第進士元符末上書奪官
謫遂州有跨黿集

錦江思

獨詠滄浪古岸邊牽風柳帶綠凝烟得魚且斫金絲膾
醉折桃花倚釣船

成都文類

觀前古美人圖

璧月塵昏瓊樹秋無從百媚一回眸
荼蘼香度梅妝冷鸚鵡聲低玉笛幽
唾背但能知禍水逢春輒莫上迷樓
歸來安守無鹽女不寵無驚共白頭

聲畫集

折楊柳

東風來何時百花已飄零
獨有堤上柳慘淡含春榮
扁舟復何適延客江上亭
顧無青玉案何以送子行
攀條欲相贈上有雙流鶯
流鶯正求友奈此離別情

漁父曲

黃蓑老翁守釣車賣魚得錢還酒家醉中乘潮過別浦
睡起不知船在沙離根半落秋江水稚子蓬頭采洲芷
蓴絲芹甲滿筠籠日暮溪橋得紅米

以上前賢小集拾遺

李孝博

孝博廣東提點刑獄

英州次蔣穎叔韻

維舟庭下號三灣萬疊青山一水閒偏愛澄江照天碧

飛來幾片白雲閒
方輿勝覽

張師正

師正字不疑熙寧中仕為辰州帥著括異志倦
遊雜錄

武林別文瑩上人

憶昔荊州屢過從當時心已慕冥鴻渚宮禪伯唐齊已
淮甸詩豪宋惠崇老格疎閒松倚澗清談瀟灑坐生風
史官若覓高僧事莫把名參技術中

碧嶂孤雲冉冉歸解攜情緒異常時餘生歲月能多少
此別應難刻後期玉壺清話

句

舊將封侯盡降王賜姓歸昇平詞分鹿是非能委夢落
花貴賤不由人隱居詩話

王世寧

臨終作

翠羽旗幟仙子隊紫皇樓閣玉皇家人閒風雨易分散

回首武陵空落花

詩話總龜太原王世寧自言籍係第十八洞玉仙人熙寧中以暴疾終于家臨終作詩云云

劉叔贛

叔贛神宗朝中書舍人

鶚按贛廣韻貢同劉敞有仲遠父之稱疑此即

劉敞貢父不敢臆斷姑附于此

過柏林院贈吉長老有古殿吳道子畫維摩居士
又有斷碑是寶歷中記義岑禪住佛院事

靈光歲久獨巋然岨首遺碑亦未遷會向三生記前佛

暫從方丈謝諸天篆香徐刻黃金印梵宇時開貝葉篇
門外霜風正搖落庭前松栢自安禪

和李公擇題相國寺壞山水歌

蒼山本是千萬丈怪爾斷落盈尺中枯松掛巖正矯矯
白雲出谷方溶溶憶昨高秋十日雨百川湧溢騰蛟龍
丹青壞卻不可住金碧拂地成都空人閒流落萬餘一
掇拾補綴幾無從當時畫手合衆妙得此誠是第一工
松陰行人何草草禿幘小蓋馬色驄長途未竟不得息

嘯歌正爾來悲風巨靈壁華疏黃河夸娥移山開漢東
海波芥子忽出沒大雄遊戲神與通我今與君未嘗覺
指視壁畫將無同新詩飄飄脫俗格得閒會復來從容

壁畫古槎歌

南山大樹楓與樗百年不到生理枯老枝錯落麋奮角
病根蟠結龍垂胡風霜不知春不改古苔懸蔓相縈帶
豈知高堂素壁上畫圖能令觀者愛野夫晨興坐樹邊
偶說此槎來上天暫乘西風犯牛斗卻看東海成桑田

次韻蘓子瞻韓幹馬贈李伯時

韓幹畫馬名獨垂冰紈素幅橫素絲諸公賦詩邀我和
我如鈍鎚逢利錐區中纔容三萬里正可腰褭一日馳
朝吳暮燕亦其亞幸得夷路無繫羈此閒三馬皆國馬
瑰姿逸態成崛竒有時秋空見霜骨下晚衆禽皆伏雌
良工苦心為遠到天機要眇潛得之區區駕駘浪自負
豈有醜骨包妍皮李侯灑筆定超詣尚有天驥君未知
宛王母寡今授首汗血不敢藏貳師

畫鶴

置此憐神駿三年故不飛軒居寧假寵野客會忘機燕
雀那相笑鳬鷖真自肥蓬萊千萬里正想玉為衣

以上
聲畫

集

張唐民

唐民熙寧中任西川轉運使京東路提刑

題捫參閣

在昌州

訟簡民淳羨小州兩衙纔退似歸休一懷山果三升酒

暮掩青峰即下樓方輿勝覽

李之純

之純字端伯滄州無棣人登進士元祐初歷寶
文閣直學士工部尚書紹聖中出知單州崇寧
中入黨籍

西園辨蘭亭和韻

綠葉纖長閒紫莖蜀人未始以蘭名有時只怪香盈室
此日方傳譽滿城思意和風揚馥郁光榮灝露滴清英

庭階若不逢精鑒何異深林靜處生

成都文類

駕幸太學

羽衛金輿煥彩章天街端去入虞庠嚴師致奠初加拜
延講終篇不計行萬乘屈尊先郡國諸生賜坐亞侯王
輔臣歸美榮歌詠首發清風政事堂

中州題詠集

梁燾

燾字況之鄆州須城人舉進士提點京西刑獄
元祐中拜尚書右丞紹聖初以黨論貶雷州別

駕化州安置卒

駕幸太學

原廟親持十月觴
天迴寶輦歎虞庠
當陽赭幄翔龍座
屬地霜袍振鷺行
拭目嚮儒移美俗
虛懷稽古自興王
太平重見清風頌
嘉句飛傳到玉堂

中州題詠集

劉奉世

奉世字仲馮
敬子官集賢校理
樞密使入元祐

黨籍

送越帥程公闕

使君遺愛徧南州，五馬新歸瘴海頭。
持橐未厭青瑣直，懷章還作鑑湖遊。
餘姚人物傳吳遠，越地山川向剡幽。
應有清詩資臥理，會吟他日記風流。

剡錄

駕幸太學

聖典垂精及表章，曠儀親舉自宗庠。
縱觀橋擁浮雲蓋，侍問庭充振鷺行。
首舉儒風隆上國，光增帝業掩前王。
太平榮遇慚多幸，重見歌虞起廟堂。

中州題詠集

周商

駕幸太學

雲覆鸞輿五色章
鳴鞘聲肅下儒庠
佩衿霧集三千子
儀衛星羅十二行
位列夔龍陪帝聖
經陳戊甲獻成王
元龜象齒方來供
不用論兵政事堂

中州題詠集

李師德

駕幸太學

隆典遺經已表章
又傳清蹕幸膠庠
黃龍繞駕天移仗

白雪分袍士綴行
況是體元能作聖
更歡稽古效規王
太平盛世文明遠
萬國儒風自一堂
中州題詠集

李階

駕幸太學

天祐斯文賴表章
皇心眷眷事膠庠
享嚴祖殿回龍馭
德警儒班肅鷺行
降輦詣祠追四聖
擁經求道舉三王
欲知盛美前無古
賢聖相逢在廟堂
中州題詠集

吳安持

安持充之子寶文閣待制王荊公之壻

駕幸太學

翰林墨客奏封章天子欣然幸國庠綵仗六龍初擁路
青衿三舍已重行隆儒共慶賢堯舜訪道誰知應帝王
附鳳騫淵皆法從獨慙由也亦升堂

汴京遺蹟志

畢仲愈

仲愈字將叔仲游弟國子監丞

句

已招明月移歌扇更喚春風試舞腰
玩明燈數點林中見橫笛一聲烟外聞

夜行

萬姓統譜

孔舜思

舜思官尚書職方郎中通判齊州

題靈巖寺

石刻在泰山

忽從平地出塵籠親到諸天釋梵宮
卻悟冗官長役物爭如大士日談空
山橫青壁千層合泉迸丹崖一線通
幽鳥靜啼人外境疎鐘不墮世閒風
目無可欲猿猱伏

心絕微塵冰鑑融自恨無緣陪宴坐他生願效種松翁
熙寧九年丙辰十月顧炎武求古錄

王延禧


延禧字仲祥熙寧中知夔州

題制勝樓

夔子城新築長江便作壕欲兼諸面敵故起北樓高即
舊基仍峻因時力不勞青天纔咫尺翠壁似周遭近照
東西灤遙分上下牢百蠻歸指掌三峽見秋毫帝道方

無外皇威到不毛三鉤閒夜鎖八陣縱春遨守土慚非
稱提兵亦謬叨經營皆使指備豫奉戎韜功乏為山助
名加制勝袞登臨欲吟咤深媿杜陵豪

名勝志



宋詩紀事卷二十六

欽定四庫全書

集部
宋詩紀事卷二十七

詳校官給事中臣鄧文泮

侍讀臣孫球覆勘

總校官進士臣繆琪

校對官典簿臣郭祚熾

謄錄監生臣劉坤

欽定四庫全書

宋詩紀事卷二十七

錢塘厲鶚撰

郭祥正

祥正字功父當塗人舉進士元豐中知端州元祐初階至朝請大夫請老歸家于青山下有青

山集

文獻通考張浮休評郭祥正詩如大排筵席二十四味終日揖讓而適口者少

竹坡詩話賀方回嘗作青玉案詞有梅子黃時雨之句人皆服其工士大夫謂之賀梅子郭功

父有示耿天鵬一詩王荆公嘗爲之書其尾云
廟前古木藏訓狐豪氣英風亦何有方回晚倅
姑孰與功夫游甚歡方回寡髮功夫指其髻謂
曰此真賀梅子也方回乃將其鬚曰君可謂郭
訓狐功夫髯而鬚故有此語
遜齋閑覽功夫曾題人山居一聯云謝家莊上
無多景只有黃鸝三兩聲荆公命工繪爲圖自
題其上云此是功夫題山居詩處即遣人以金
酒鍾并圖遺之

明皇十眉圖

明皇逸事傳十眉正是唐家零落時霓裳曲調雖依舊
阿蠻終不似楊妃畫工貌得非無意欲使流傳警來世

翠翹紅粉尚爭春
隱約香風起仙袂
六龍眞馭竟何之
泰陵荒草長狐狸
猶將妙筆勸尊酒
醉覺人間萬事非

金山行

金山杳在滄溟中
雪崖冰柱浮仙宮
乾坤扶持自今古
日月彷彿懸西東
我泛靈槎出塵世
搜索異境窺神功
一朝登臨重歎息
四時想像何其雄
卷簾夜閣挂北斗
大鯨駕浪吹長空
舟摧岸斷豈足數
往往霹靂掇蛟龍
寒蟾八月蕩瑤海
秋光上下磨青銅
鳥飛不盡暮天碧

漁歌忽斷蘆花風

王直方云二語大爲荆公所賞

蓬萊久聞未曾往壯

觀絕致遙應同潮生潮落夜還曉物與數會誰能窮百
年形影浪自苦便欲此地安微躬白雲南來入長望又
起歸興隨征鴻

苕溪漁隱叢話功甫金山行造語豪壯

鳳凰臺次李太白韻

高臺不見鳳凰游浩浩長江入海流舞罷青蛾同去國
戰殘白骨尚盈丘風搖落日催行櫂湖擁新沙換故洲

結綺臨春無處覓年年荒草向人愁

娛書堂詩話郭功甫嘗與王荊公登金陵鳳凰臺追次李太白韻援筆立成一座盡傾

訪隱者

一徑沿崖踏蒼壁半塢寒雲抱泉石
山翁酒熟不出門殘花滿地無人跡

以上青山集

寄東坡先生自朱崖量移合浦

君恩浩蕩似陽春海外移來住海濱
莫向沙邊弄明月夜深無數採珠人

困學紀聞東坡文章好譏刺文與可戒以詩云
北客若來休問事西湖雖好莫吟詩晚年郭功
父寄詩云云

李公麟

公麟字伯時舒城人第進士歷泗州錄事參軍
用陸佃薦爲中書門下後省刪定官御史檢法
元符三年病痺致仕歸老龍眠山

蔡寬夫詩史韓幹畫馬多分其駿爲三莫曉何
意唯白樂天春深學士家詩云鳳書裁五色馬
鬣翦三花唐學士例惜飛龍殿馬則應是時國
馬皆如此也李伯時喜學韓幹畫每不知三駿

之意常難於下筆有得樂天詩者先爲誦之而
不言所出伯時請之力乃使爲畫數馬始以集
示之云

次韻鄧謹思初入試院

敕使書囊問隊行聚星深館聚諸英雲隨襟袖來蓬島
香散房櫳宿化城振鷺充庭天有幕珊瑚入網海無聲
範模一世尊先覺況此提平慰後生

同文館倡和詩

小詩并畫卷奉送汾叟同年機宜奉議赴熙河幕
府

畫出離筵已愴神那堪真別渭城春渭城柳色休相惱
西出陽關有故人

聲畫集

春社出郊

千尋古櫟笑聲中此日春風屬社公開眼已憐花壓帽
放懷聊喜酒治聾攜刀割肉餘風在卜瓦傳神俚俗同
聞說已栽桃李徑隔溪遙認淺深紅

事文類聚前集

呂希純

希純字子進公著次子登第爲太常博士哲宗

朝歷寶文閣待制知亳州謫道州安置後入黨籍

絕句

夢寢西山結草廬
逝將臨水詠游魚
何人見卯求時夜
更著閒言問藐姑

紫微詩話崇寧間談命術者多言叔祖待制與曾內翰子開皆宰相命也或有占紫姑者代書村童書於紙云待曾呂相方發然皆不驗叔祖有詩云

元夕

何處元宵好
迎鑾冊府西
鞘聲雲外起
扇影日邊低
祕

禁威容肅名流步武齊舜瞳回左顧真欲過金閨

何處元宵好雙林宴坐僧戒圓三五夜心耀百千燈茅

舍門常掩繩牀几謾憑世間娛樂事一念不曾興

瀛奎律髓

林迴

迴羅源人熙寧中惠安簿

同黃祕教遊連江玉泉

泉山好景微權尹訟庭稀曉馬破雲去夜船乘月歸妓

歌珠不斷人醉玉相依薄宦自拘者咄哉多是非

青瑣高議

題林子默隱居

先生平昔命何非萬卷詩書一布衣回首長安成底事

吳山蒼翠幾時歸

泉州府志

俞充

充熙寧中虞鄉令

王官谷十詠

存四

貽溪

表聖山居記云谷之名本以王官廢壘在其側司空氏易之爲貽溪溪舊不蓄魚及

表聖居之石竇泉隙魚皆充物見於說魚篇今亦無魚

濯纓溪流上清心共澄澈人存魚自躍人亡魚亦竭此
意雖冥冥可與仁者說遺音竟誰繼十里閒風月

休休亭

本濯纓亭爲俠軍所焚復構之易名休休

洗耳謝市朝構亭得餘址三徑草長深一毫塵不起支
肘看青山引鶴聽流水獨有愛君心時時擬綸旨

司空氏舊居

王官谷舊晉司空氏別業自表聖沒轉易不常

孤鶴去不還雲間犬空吠猶聞溪鳥銜

表聖詩云溪鳥待排衙

尚

有里人愛

表聖多以金帛施於閭里

巖花無開落

表聖云小峯西翕有石蘚故老目爲

杏
花
世事幾興廢我乘幽興來靜邀秋月對

石硯

表聖云西谷路有石如硯人謂之秦王硯

嘗讀表聖詩云是秦王成憫時著密史

表聖所著密史深救時病對

此潛經營新雨淨如洗亂苔生復平

表聖詩云硯石苔平失

應誤

山中客浪近翰墨名

王官谷集

仇伯玉

訪王官谷休休亭

飄香山徑踏殘花來訪仙鄉隱處家當日廟堂延至計

未應懷壁老煙霞

山鵝營巢欲哺兒
晴杏拆早先離披
盤回一徑穿碧篠

谷口數家耕水湄

王官谷集

王翰

司空侍郎故居

西風策馬問王官
松徑縈紆上百盤
泉響夜潭穿石竇
峯高天柱矗雲端
一鳴共許才華舊
三詔方知節操寒
花落鳥啼人不見
休休亭上倚闌干

王官谷集

陳易

易莆田人熙寧中隱居石門時號陳聘君

荅有需禪師

年來多病愛棲禪寶鑑慵將照醜妍卻憶南湖孤頂月

定回金磬落巖前

興化府志

楊時

時字中立將樂人熙寧九年進士游二程之門

歷知瀏陽餘杭蕭山三縣召爲祕書郎欽宗朝

兼國子祭酒高宗朝除工部侍郎兼侍讀以龍
圖閣直學士提舉洞霄宮卒諡文靖學者稱龜
山先生有集

望湖樓

斜日侵簾上玉鉤簷花飛動錦紋浮湖光寫出千峯秀
天影融成十里秋翠鷗翻風窺淺水片雲隨意入滄洲
畱連更待東窗月注目晴空獨倚樓

觀梅贈胡康侯

欲驅殘臘變春風，惟有寒梅作選鋒。
莫把疎英輕鬪雪，好藏清豔月明中。

藏春峽

烏隱士吳儀作

山銜幽徑碧如環，一壑風煙自往還。
不是武陵流水出，殘紅那得到人間。

含雲寺書事

蜨夢輕揚一室空，夢回誰識此身同。
窗前月冷松陰碎，一枕溪聲半夜風。

以上龜山集

求仲弓

仲弓字德夫黃巖人熙寧九年特科與王荊公
爲文字交仕終樂平令

靈龜潭

江湖雖濶多罾網幽澗清虛且勉旃待我功成買雙鶴
歸來伴汝一千年

赤城志

陳覺民

覺民字達野仙遊人熙寧九年進士元祐間知

建陽縣累遷宗正丞歷知漳建二州移知福州
言者承安惇意劾罷尋起知泉州遷本路提刑
復以右文殿修撰知廣州卒

武夷山

昇真洞口接天門靈草丹桃日日春聽說列仙來瑞世
三朝德業在斯民

方輿勝覽章聖出自武夷事見楊大年家集神
考括廟亦武夷真君應出故有三朝德業之句
事見氏族編

寄米元章

汨汨塵埃閱歲華
青山相見認空花
清淮風月元無價
憑仗詩翁爲我賒

長淮千古自流東
六月城頭日日風
天際玉潢無少處

夜山圍在月明中

珊瑚網

姚 孳

孳字舜徒
慈谿人
熙寧九年進士
累除提舉成
都府常平事
後以直龍圖閣知夔州事卒

碧波亭

在簡州東溪

賴簡池臺兩蜀誇東溪別是一仙家
令人卻憶康王谷
坐看珠簾濺雨花

錦繡萬花谷

李格非

格非字文叔濟南人舉進士元祐末爲國子博士
紹聖初爲禮部郎提點京東刑獄以黨籍罷
長女能詩嫁趙明誠即易安也有集

過臨淄

擊鼓吹竽七百年臨淄城闕尚依然如今只有耕耘者
曾得當時九府錢

後村詩話文叔詩文高雅條暢有義味在晁秦之上

賀幸太學

日月天回十二章詔移清蹕幸膠庠六龍穩轉橋門曲
多士橫穿錦仗行俎豆威儀瞻闕里東西風教自周王
太平誰謂初無象四海形容在一堂

汴京遺蹟志

葉濤

濤字致遠處州龍泉人熙寧進士仕至中書舍
人龍圖閣待制入元祐黨籍

望舊廬有感

重來舊屋誰爲主江令蕭條歎獨存已媿問人纔識路
卻悲無柳可知門舟車到處成家宅歲月惟驚長子孫
孤客濫巾非得已故交零落與誰論

江令尋宅詩云見
桐猶識井看柳尚

知門 宋文鑑

張介

介字吉甫番陽人

句

應是子規啼不到致令我父未歸家

能改齊漫錄番陽張吉甫方娠時父去客東西川不還張君自爲兒時已愴然有感恩言語食息未嘗不在蜀也與尚書彭公器資同學作詩云云聞者皆憐之既長走蜀父初無還意乃歸省母復至涪間往逐者三其父遂行以熙寧十年三月至自蜀鄉人迎謁太息或爲感泣一時名士賦詩以紀其事

錢景謏

景謚景臻從兄舉進士居毗陵熙寧末從張景
憲辟知瀛州至朝請郎

洞霄宮

清夜宿瑤宮雲開天柱峯千巖空洞月萬籟古壇松仙
馭聞鳴鶴琅輿想六龍朝元步虛罷祥吹引林中

洞霄詩集

杜默

默字師雄濮州人熙寧末特奏名仕新淦尉

王直方詩話石守道作三豪詩謂曼卿豪於詩
永叔豪於文杜默豪於歌故詩云師雄二十二

筆距猛如鷹玉川月蝕句氣欲相憑陵而歐公亦有詩云南山有鳴鳳其音和且清鳴於有道國出則天下平杜默東土秀能吟鳳凰聲作詩幾百篇長歌仍短行謂豪於歌者有送守道詩云聖人門前大蟲學海波中老龍及推倒楊朱墨翟扶起仲尼周公之句

句

一片靈臺挂明月萬丈詞焰飛長虹乞取一勺鳳沼水

活取久旱泥蟠龍

上歐陽青瑣高議

倚風莫恨唐工部後裔寧

知不解詩

東平郡宴賦海棠

蔡寬夫詩史

蟾輝吐光育萬種我公得此爲心胸老桂根株撼不折

我公得此爲清節孤輪碾空週復圓我公得此爲機權
餘光燭物施洪惠我公得此爲經濟

隱居詩話李文定公八月十五日生杜默作中秋月詩以獻其中有句云云雖造語粗淺然亦豪爽也

廖正一

正一字明畧號竹林居士安陸人元豐二年進士元祐中召試館職除祕書省正字出知常州紹聖間入黨籍貶監玉山稅有竹林集

郡齋讀書志廖明畧元祐中召試館職蘇子瞻
在翰林見其所對策大奇之俄除正字時黃秦
晁張皆子瞻門下士號四學士子瞻待之厚每
來必命侍妾朝雲取密雲龍家人以此知之一
日子瞻又取密雲龍家人謂是四學士窺之乃
明畧來謝也

汝墳驛題壁

阿憐二十頗有餘秀眉豐頰冰瓊膚無端欲作商人婦
更枉方尋海畔夫

阿梅筭歲得同歡懊惱情深解夢蘭鶯語輕清花裏活
柳條弱嫩掌中看

墨莊漫錄明畧與唐州二營妓往來情好甚篤
其一小字憐憐其一名梅時憐憐爲大賈所納
明畧道過汝墳有感作詩方尋海畔夫用海上
有逐臭之夫事譏之也

答張十八畫

玉人風味夙相親骨法多奇巫峽神何幸丹青煩右相
坐令虛室四時春

聲畫集

和補之梅花

蕙蘭芳草久睽離偶洩春光此一枝自許輕盈羞粉白
何人閒麗得鄰窺寒欺薄酒魂消夜月入重簾夢破時

幸有暗香襟袖暖江南歸信不應遲
梅花鼓吹

蔡肇

肇字天啟丹陽人元豐二年進士徽宗朝歷官
戶部郎兼修國史中書舍人以顯謨閣待制知
明州奪職提舉洞霄宮會赦復知睦州卒有丹

陽集

王直方詩話夏時道言蔡天啟初見荆公坐間
偶言及盧仝月蝕詩人鮮有誦得者天啟誦之
終篇遂爲荆公所知
石林詩話王荆公在鍾山有馬甚惡蹄齧不可

近一日兩校牽至麾下告公請鬻之天啟時在
生曰安有不可調之馬第久不騎驕耳即起捉
其馱一躍而上不用銜勒馳數十里而還公大
壯之即作集句詩贈之蔡子勇成癖能騎生馬
駒復有生著青衫騎惡馬日行百里尚嫌遲心
原落落堪爲將卻是君王未備知士大夫自是
盛傳荆公以將材許之云

敬用无咎學士年兄長韻上呈子方太僕

兩河郡縣淪西方西人思漢今未忘果園蕪沒白草芳

靈州乃赫連
勃勃果園

旃裘戲馬誰家郎車箱峽口澗谷長旄頭

倒挂回穹蒼王師西出討獠狂六花旗壘來堂堂前鋒

銳頭臂兩槍伏姦謹索收生羌天聲隱轡搖姑臧奇兵
繚臂斷饋糧決河有聲如壞岡城頭擊鐘聲殷牀萬甲
幾欲漂無旁雖有伉健誰騰驤一夫不敢陵彼隍馬首
欲東促歸裝緘胸有策鬚眉揚歸來恍恍若有亡劬勞
累日何由償戰鞍挂屋尋書囊目隨飛鴻思帝鄉彭城
老將官橫行幕中市駿收驪驕射堂兩部奏清商應弦
破鎬如蜂房劉渭州射爲天下第一笑談斥土羈名王畫圖遣秦
朝明光詔書畱典眞乘黃錦韉玉勒春風香平池老柳

高雲涼神駿在目豪吟觴跨下蹀躞驚鳬翔皇居九衢
天中央我時項背聊相望西城九月天墮霜夜談關塞
評文章微言竊比惠與莊和詩禿筆覺我忙祝君韜養
壽且祥功名有來成堵牆勿驚寒暑敗肉漿韞弓箠矢
用則張

同文館倡和詩

題畫授李伯時

鴻雁歸時水拍天平崗老木尚寒煙付君餘地安漁艇
乞我寒江聽雨眠

汎舟橫塘遇雨

平野風煙入夢思
殷勤作畫更題詩
扁舟臥聽橫塘雨
恰遇江南歸雁時

墨莊漫錄天啟久官京師日有藪澤之思常于尺素作平岡老木極有清思因授李伯時令于餘地加遠水歸雁扁舟以載天啟題詩云云伯時嬾不能竟他日王漁之取去以示宗子令戡即取筆點染如詩中意天啟見之愛其佳後天啟汎舟宿橫塘遇雨閉篷而臥夜分不寢聞歸雁聲因復爲詩云云

從孫元忠乞貓

廚廩空虛鼠亦飢終宵齮齧近秋帷腐儒生計唯黃卷
乞取銜蟬與護持

墨莊漫錄

送錢齊玙倅蘇州二首

一尉東南屈指中雍容車騎舊兒童郎君扇枕家中晚
侍史焚香省戶空十里浮梁晴臥竦一江春水淨磨銅
三年官滿東吳去爲具扁舟破浪風

洞庭飛雨打湘弦燕寢凝香思渺然四者難并知我老
七言俱賦爲君妍雜花遠徑迎籃輦春鳥喧洲起畫船

聞道山公方啟事重看一鶚在秋天

除夜宿垂虹亭

東南勝境未忘情老去扁舟復此行小邑歲除無市井
下田水落見農耕雪消西嶺層樓出春到重湖鱗甲生
橋下霜蛟貪睡美爲槌千鼓作雷聲

以上吳郡志

題李世南畫扇

野水潺潺平落澗秋風瑟瑟細吹林逢人抱甕知村近

隔屋聞鐘覺寺深

宋文鑑

再至學省

平生擾擾復膠膠學省重來歲又交騎馬醉遭官長罵
讀書慚被學生嘲何爲眷戀五斗米便可經營一把茅
好買江干千箇竹待看煙雨長春梢

合璧事類後集

過邢惇夫墓下作

人物于今歎渺然孤墳宿草已生煙日暮行人道傍歇

應逢年少共談玄

詩人玉屑

申王畫馬圖

天寶諸王愛名馬千金爭致華軒下當時不獨玉花驄
飛電流雲絕瀟灑兩坊岐薛寧與申憑陵內廐多清新
肉馱汗血盡龍種紫袍玉帶眞天人驪山射獵包原隰
御前急召穿圍入揚鞭一蹙破霜蹄萬騎如風不能及
雁飛兔走驚弦開翠華按轡從天回五家錦繡徧山谷
百里烏珥遺塵埃青驪蜀棧西超忽高隼濃娥散荊棘
苜蓿連天鳥自飛五陵佳氣春蕭瑟

茗溪漁隱叢話東坡集有申王畫馬圖詩乃蔡
天啟作氣格有類東坡世因悞收入其後姑蘇

居世英家刊東坡前後集遂刪去

題李伯時照夜白馬圖

天上房星不下來連山芻粟飽駘龍姿逸駕飛騰盡
賴爾毫端力挽回

茗溪漁隱叢話

題朱之純谷陽園

陸機異時宅故物無復迹悠悠谷水陽野水淒餘碧我
觀豪士賦文字豈不白一爲功名誤末路眞可惜至今
風雨夜哀鶴鳴不息千秋得吾人淨眼照阡陌結茅風

煙際一悟世網窄古今一丘貉貴賤百年客閉門橙橘
香隱几冰凍釋我慙升斗祿矯首望八極人生勞佚間
此殆天所檄鵬翔亦霄動鯨噴碧海坼爲爾具扁舟送
此齒髮迫至元嘉禾志

送洞元法師歸茅山

絳節飄飄下紫清更參隱訣制顏齡若逢方丈龐眉叟
來受囊中赤甲經

一菴疇昔共嶽崙古木垂陰歲月深恐是三生房次律

要隨藤杖去重尋

題三茅風雨圖

筆間雲氣生毫末紙上松聲聽有無收得三茅風雨樣

高堂六月是冰壺

以上茅山志

立春至焦山

歲爲茲山一再登籃輿乘興薦溝塍春生江海交流處
人在藤蘿最上層畫鷁搶沙眠百賈華鯨吼旦集千僧

道人邀上東巖宿坐看冰輪半夜升

京口三山志

出山龍池

在宜興有禿角白龍穴其中將雨則見

南山皦皦天作鼓號召諸龍盡行雨惟有禿角最先到

潑墨雲中雪鱗舞

名勝志

冬日遊甘露寺

漕河膠舟水流咽水關著鍵行者歇大江伏槎臥長劍
萬頃溼銀寒不結蓬萊諸仙亦避寒海門冥冥凍欲折
朔風吹晚雁叫空蓬卷松杉崖石裂道人丈室最高處
地爐蒲團穩坐熱我來乘閒不問道方牀相對無言說

鎮江府志

句

城響濤頭入山昏雨腳斜
柳間黃鳥路波底白鷗天

斷篷帆影天斜入夾鏡波光水倒流

松江雪浪齋日記

疊嶂

巧分丁字水臘梅遲見二年花

唐漢詩話天啟紹聖元符間爲中書舍人嘗與
元祐諸公遊遂遭斥逐嘗守睦州到任謝表有
曰城雉閒寂一葉落而知秋島嶼縈迴二水合
而成字復有語云云人謂能狀桐廬郡景物
鶚按此二句有全詩見唐杜牧之集未知孰是

華鎮

鎮字安仁會稽人元豐二年進士官至朝奉大夫嘗作會稽覽古詩子初平亦登進士爲太常博士有越中考古錄

會稽覽古詩

鐵門限

王中令裔孫智永善隸草爲世所重求者弗逮戶外之人如市所居限頻爲之

毀以鐵固之時號鐵門限真草千字文十九年成一千通柳誠懸稱其書得家法世傳右軍蘭亭真蹟弟子辨才尤加寶祕貞觀中求之不得至使蕭翼設奇而取之山中父老尚能道其事

鐵限僧坊迹未移
千通眞草了無遺
蘭亭墨蹟何由見
祇說蕭郎奉使時

秦望山

秦始皇東巡登高歷覽刻石紀功故曰秦望

秦人兩世盡東游
輦輅曾臨到上頭
睫在眼前終不見
不知登望竟何求

樵風涇

鄭巨君弘來薪若耶山中得仙人遺箭歸之而獲便風之報千載之下朝暮不

渝

碧山重疊水溶溶
南北朝來旦暮風
巖壑會稽眞勝絕

樵蘇猶是漢三公

城山

其山中卑四高宛如城堞吳伐越次查浦句踐保此拒吳又名越王城有佛眼泉洗

馬池泉中產嘉魚越拒吳時吳意越之乏水以鹽魚爲饋越取雙魚答之遂解圍去

兵家制勝舊多門贈答雍容亦解紛紛緩報一雙文錦鯉
坐歸十萬水犀軍

雙筍石

在上虞縣釣臺山高百餘丈若人冕而對峙者其巔有異花每杜鵑啼時開若

霞錦神宗崩三年不榮高宗崩花忽變白孝宗崩三年若枯既而復茂

千尺相高卓翠珉雨餘雲外露嶙峋鼎湖龍去蒼髯斷

三載叢花不記春

放馬澗

在新昌縣支道林放馬之所或譏道人養馬不韻答曰貧道賞其神駿

春草茸茸澗水清
路人猶記昔時名
金羈縱後雙蹄逸
想見風前蹀躞聲

虞國墅

在餘姚羅壁山襟帶溪山大勢具體金谷郝太宰偏遊諸境棲情於此每至良辰攜子遊憩後以司空臨郡遂卜居之

山列翠屏圍碧落
水流鳴管繞平田
郝家池館蘿蘂沒

金谷形容自渺

一作宛然

燕竹 越人以其燕來時出筍因以爲名

竹箭黃芽欲老時
杏梁日暖燕初歸
他林未聳千竿翠
此地先抽一握肥

孟橋 橋南漢孟嘗宅也

溪上還珠太守家
小橋斜跨碧流沙
清風不共門牆改
長與寒泉起浪花
以上會稽志

傅崧卿云詞格清麗興寄深遠足以垂觀來者

陳 瓘

瓘字瑩中號了翁沙縣人僊子元豐二年進士
徽宗朝歷右司諫權給事中崇寧中以黨籍除
名編隸台州移楚州卒靖康中贈諫議大夫紹
興中賜諡忠肅有了齋集

吳江作

中郎亭榭據江鄉雅稱詩翁賦卒章蓴菜鱸魚好時節
秋風斜日舊煙光一杯有味功名小萬事無心歲月長
安得便拋塵網去釣舟閒繫畫闌旁

中吳紀聞陳文惠公留題松陵詩其末有秋風
斜日鱸魚鄉之句屯田郎林肇爲吳江日作亭
江上因以鱸鄉名之了翁初至吳江簿賦詩云
云筮仕之初已無戀官職之意矣

寄覺範長沙

大士游方興盡回家山風月絕纖埃杖頭多少閒田地

挑取華嚴入嶺來

茗溪漁隱叢話

自合浦還清湘寄虛中弟

行徹天涯萬里山月明方照海珠還瘴鄉來往渾閒事

聊爲清湘一破顏

桂林府志

蘇文饒往昌國意頗憚之送以詩

已聞舟楫具那得苦畱君雨過霜風急帆飛雪浪分長
途方策足暇日正論文功業他年事風波豈足云

文饒自京師還欲往昌國而風作不可渡絕句戲
之

欲衝高浪卻沈吟酒近瀛州嬾得斟莫道顛風無好意
爲君吹過遠歸心

以上定海縣志

沈偕

偕字君與湖州人元豐二年進士

齊東野語吳興東林沈偕東老之子家饒於財少避京師入上庠好狎游時蔡奴聲價甲於都下沈欲訪之乃呼一賣珠人於其門首茶肆中議價再三不售撤其珠于屋上賣珠者窘甚沈笑曰第隨我來依汝所索還錢蔡于簾中窺見令取視之珠也大驚惟恐其不來後數日乃詣之其家喜相報曰前日撒珠郎至矣接之甚至一日攜上樊樓樓乃京師酒肆之甲飲徒常千餘人沈偏語在坐皆令極量盡歡至夜盡爲還所直而去于是豪侈之聲滿三輔既而擢第盡買園子監書以歸

遺賈耘老蟹

黃杭稻熟墜西風肥入江南十月雄橫踈蹕跼鉗齒白
圓臍吸脇斗膏紅壘須園老香研柚羹藉庖丁細擘蔥
分寄橫塘溪上客持螯莫放酒杯空

齊東野語賈耘老隱苕城南橫塘上沈以詩遺之蟹得詩不樂和韻詆之沈得報怨曰吾聞賈多與郡將往還預政言人短長曾爲人所訟吾以長上推之乃鄙我若此復用韻報之有園雌還卻勝尖雄之句賈晚娶真氏人謂賈秀才取真縣君以爲笑沈所指園雌爲此賈尋悔之而戲語已傳播矣

周 錡

鐸字廉彥鄆人元豐二年進士初調桐城尉不
赴豐稷范祖禹薦知南雄忤時相入元祐黨籍
退休西湖有集

寄題錢公輔衆樂亭

雙虹倒影上簷楹碧水澄空一鏡明野草閒花無限趣
短藜幽榜不勝情已知風月隨人意聊爲湖山載酒行
卻訝錦囊賡夢草坐令詩思繞寰瀛

延祐四明志

佛蹟巖

在慈谿縣東北大蓬山

靈山名大蓬香水靄蒼龍祇久覆護雲物翳深谷拂
衣向劫中神斧斷蒼玉至今天人尊靈跡印金粟頗聞
開士讖飛錫隱巖麓坐令湖海間香供走川陸巍巍虔
報地色相儼金屋緬想舊巾瓶猶能慰心目籃輿訪蓮
社一笑欣自足撫事動幽尋疇能念榮辱松爐裊如見
餘力付碁局更覺夢中身翛然百無欲

寧波府志

題全氏萬金樓

幾年江上夢黃鶴意悠悠百尺獨臨水萬金難買秋杵

聲喧藥市闌影浸漁舟應有湖中客分身向此遊

甬上
耆舊

集

龔原

原字深之處州遂昌人第進士徽宗朝歷兵部
侍郎寶文閣待制奪職居和州嘗入元祐黨籍

贈王筌并序

筌字子真富鄭公客元豐中賜號冲照處士元符三
年從劉先生受上清籙華陽洞便門一夕忽開自左

慈得進洞宮旋閉且千載矣

華陽新報洞門開應為高人受錄來試問玉門砂遠近

未饒元放是仙才

茅山志

陳偁

偁字君舉沙縣人世鄉子以父任補太廟齋郎

調蔡州通判屢知泉州惠三州以朝議大夫致

仕卒

題泉州萬安橋

跨海爲橋布石牢那知直下壓靈鼇基連島嶼規模壯
勢截淵潭氣象豪鐵馬著行橫絕漠玉鯨張鬣露寒濤
縑圖已幸天顏照應得元豐史筆褒

方輿勝覽泉州萬安橋一名洛陽橋嘉祐間太守蔡君謨勸州民成此橋元豐初運使王公嘗進畫本天子嘉賞故卒章及此

宋詩紀事卷二十七